



## SERVISIO PA INFORMASHON DI GOBIERNU DI KORSOU

### Komunikado di prensa

#### **Gobièrnu ta tuma un paso importante pa desaroyo struktural di Kòrsou**

*Presupuesto i programa di gobernashon aliñá ta drenta un rònt di advies*

E siman aki Gobièrnu lo trata e input ku e ministerionan a duna pa e Presupuesto suppletoir pa 2011 i e Programa di Gobernashon 2010-2014. E siguiente paso ta pa pidi e órganonan konserní manera Raad van Advies i Commissie Financieel Toezicht (CFT) nan punto di bista riba e presupuesto suppletoir, promé ku - huntu ku e Programa di Gobernashon - e presupuesto lo keda entregá na Staten den e promé kuartal di e aña aki. Esaki ta konforme e planifikashon ku e gabinete a primintí parlamento den desèmber 2010.

E Programa di Gobernashon i e Presupuesto suppletoir tin komo base e Akuerdo di Gobernashon, esta, e akuerdo polítiko entre Movimento Futuro Kòrsou, Pueblo Soberano i MAN. E akuerdo a keda firmá dia 9 di novèmber 2010 i tambe akseptá pa frakshonnan di koalishon den Staten. E Akuerdo aki ya kaba tabata mensioná e vishon pa nos pais i e metanan stratégiko di e gabinete-Schotte, huntu ku un spesifikashon di tur prioridat pa e próksimo 4 aña pa kada ministerio.

Sinembargo gabinete Schotte a sigui desaroyá e planifikashon pa desaroyo di nos pais na un nivel mas detayá i spesifiká na tempu entre 2010 i 2014, pa asina yega na un Programa di Gobernashon ku ta stipulá e metanan i tareanan spesífiko di Gobièrnu pa e próksimo 4 aña. Tambe gabinete-Schotte a pone un relashon dirèkt entre e Programa i e Presupuesto suppletoir pa 2011, pa asina garantisá ku tur plannan di Gobièrnu tin nan base finansiero i ta realístiko. A prepará e aliñamentu di e maneho ku e presupuesto den workshops speshal pa tur ministerionan, ku a tuma lugá siman pasá.

Pa e aña aki mester a tene kuenta ku e presupuesto pa 2011 ya kaba tabata planiá pa nos pais. Den un vershon adaptá, loke nos ta yama un presupuesto suppletoir, lo bini ku kambionan ku ta reflehá maneho di e gabinete-Schotte medio di un kantidat di prioridatnan limitá pa kada ministerio. Asina ta purba pa adaptá e maneho na e espasio finansiero den e presupuesto eksistente. Pa 2012 i e aña despues lo por premirá kambionan mas drástiko den e presupuesto pa asina e ta reflehá mas mihó i mas visibel e eskohonan den maneho di gabinete-Schotte.

E konekshon entre e Presupuesto di Kòrsou i e Programa di Gobernashon ta un paso importante pa yega na un desaroyo di nos isla na un manera responsabel, planiá i realístiko. Ta pa promé biaha ku e plannan di gobièrnu i e presupuesto ta aliña na un manera asina estrikto. Esaki lo fasilítá realisashon di e espektativanan haltu ku nos komunitat tin di Gobièrnu di nos pais hóben.